

REGLUGERÐ um framkvæmd laga um lýðskóla

1. gr.

Gildissvið

Reglugerð þessi fjallar um framkvæmd laga um lýðskóla.

2. gr.

Viðurkenning og afturköllun

Um viðurkenningu og afturköllun hennar gilda stjórnssýslulög.

Menntamálastofnun annast veitingu viðurkenningar til lýðskóla í samræmi við ákvæði laga um lýðskóla. Þegar viðurkenning er veitt skal Menntamálastofnun ganga úr skugga um að skóli uppfylli skilyrði laga um lýðskóla.

Viðurkenning er veitt skriflega og þar skal lýst þeim skilyrðum sem sett eru.

Viðurkenning er ávallt skilyrt því að lýðskóli uppfylli 6. tölul. 2. mgr. 3. gr. laga um lýðskóla.

3. gr.

Umsókn

Sótt er um viðurkenningu til Menntamálastofnunar og skulu eftirfarandi gögn og upplýsingar fylgja umsókninni:

1. Staðfesting á rekstrarformi, upplýsingar um eigendur og staðfesting á að skólinn sé ekki rekinn með fjárhagslegan ágóða að markmiði.
2. Staðfesting á því hvernig fjárhagslegri ábyrgð er háttað og hvernig fjárhagslegt rekstraröryggi starfseminnar er tryggt. Hægt er að krefjast bankatryggingar sem samsvarar rekstrarfjárhæð skólans fyrir eina önn.
3. Vottorð frá yfirvöldum heilbrigðis- og brunamála, lýsing á aðgengi fatlaðra og lýsing á aðstöðu, s.s. heimavist, öðru húsnæði skólans og búnaði.
4. Upplýsingar um stjórn, starfshætti og skipurit.
5. Gögn um hvernig skólastjóri uppfyllir þær kröfur sem gerðar eru til menntunar og reynslu.
6. Þarfagreining á mikilvægi og mögulegri eftirspurn eftir námi skólans og lýsing á því hvernig ákvæðum um inntak náms er fullnægt.
7. Skólanámskrá sem tekur til allra þátta skólastarfsins.
8. Lýsing á innra mats kerfi.
9. Lýsing á skjalastjórnun og nemendabókhaldi ásamt því hvernig umsækjandi mun tryggja nemendum aðgang að upplýsingum um námsferil eftir að námi lýkur.
10. Stefna skólans gegn ofbeldi ásamt viðbragðsáætlun.
11. Lýsing á ferli þar sem nemendur geta komið sjónarmiðum sínum og ábendingum á framfæri.

Menntamálastofnun er heimilt að óska eftir frekari gögnum telji stofnunin þau nauðsynleg til að sinna hlutverki sínu.

4. gr.

Veiting upplýsinga

Lýðskóli skal veita Menntamálastofnun árlega skýrslu um starfsemina og veita allar umbeðnar upplýsingar um rekstur og starfsemi þegar óskað er.

5. gr.

Afturköllun viðurkenningar

Uppfylli viðurkenndur lýðskóli ekki lengur skilyrði laga um lýðskóla eða reglugerðar þessarar getur Menntamálastofnun afturkallað viðurkenninguna. Áður en til afturköllunar kemur skal stjórn lýðskóla send aðvörun þar sem lýst er þeim aðfinnslum og athugasemdum sem gerðar hafa verið við starfsemi hans. Heimilt er að veita lýðskóla allt að þrjá mánuði til að bregðast við athugasemdum og leggja fram áætlun um hvernig bætt verði úr ágöllum á starfseminni. Um málsmeðferð fer að öðru leyti samkvæmt stjórnsýslulögum.

6. gr.

Gildistaka

Reglugerð þessi, sem sett er með heimild í 12. gr. um lýðskóla, öðlast þegar gildi.

Mennta- og menningarmálaráðuneytinu 22. janúar 2020